

SCRIPT OF MORNING GOJRI NEWS BULLETIN 16JUNE 2026  
1015HRS

مارننگ گوجری نیوز بولیٹن 16 جون 2026

\*\*\*\*\*

یوہ آکاشوانی جموں ہے عبیدالرحمان تیں خبر سُنو۔

\*\*\*\*\*

### CM STATEHOOD

وزیر اعلیٰ عمر عبداللہ نے کہیو ہے کہ پارلیمنٹ غا مونسون اجلاس غا آغاز ور جموں کشمیر نانہہ ریاست غا درجہ غو مطالبو کرتا واں احتجاج کرن غا منصوبہ مانہہ کوئے تبدیلی نی ہوئی ہے۔ انہاں نے کہیو کہ جس طرح پہلاں تیں ہی اس گل غو اعلان ہو چُکو ہے ہم دہلی جاں گا تے ایک دن وستے جنتر منتر ور اپنا خیالات پیش کراں گا وزیر اعظم نریندر مودی نال مُلاقات غا حوالہ سنگ وزیر اعلیٰ نے کہیو کہ ہم نے وزیر اعظم نال بکھ بکھ معاملات ور تبادلہ خیال کیو جن مانہہ جموں کشمیر غی مالی حالت ریاست غا درجہ غی بحالی تے ترقیاتی کام کاج نانہہ مزید تیز کرن جیسا معاملات شامل تھا۔ انہاں نے اُمید ظاہر کی ہے کہ وزیر اعظم نال ہوئی مُلاقات تے گل بات نال جموں کشمیر غا لوکاں نانہہ فائدو حاصل وے گو۔

\*\*\*\*\*

### CM APPOINTMENT LEADERS

وزیر اعلیٰ عمر عبداللہ نے گزشتہ روز ایس کے آئی سی سی سرینگر مانہہ عوامی کم کاج سڑکاں تے عمارتاں وستے نوا پرتھی ہویا 132 سیول محکمہ غا جونئیر انجنئیر نانہہ تقرری خطوط تقسیم کیا۔ اس موقعہ ور خطاب کرتا واں انہاں نے نوجوان انجیراں نانہہ مبارک باد پیش کی تے کہیو کہ وے دیانت داری ، پیشہ وارانہ صلاحیت تے بہترین کارکردگی غا عزم غے نال اپنی خدمات انجام دیں ، وزیر اعلیٰ نے کہیو کہ انجنئر قومی تعمیر مانہہ سب تیں آگے ہیں تے بُنیادی ڈھانچہ نانہہ مضبوط بنان تے جموں کشمیر غی مجموعی ترقی مانہہ ان غو برو اہم کردار ہے۔ نائیب وزیر اعلیٰ سریندر چودھری تے چیف سیکرٹری اٹل ڈلو نے وی اس پروگرام مانہہ شرکت کی۔

\*\*\*\*\*

### LG SANJAY

لیفٹیننٹ گورنر منوج سنہا نے گزشتہ روز لوک بھون سرینگر مانہہ شری امرناتھ جی یاترا گائیڈ بُک گا 15 واں شمارا گو اجرائی کیو۔ اس موقعہ ور ایل جی موصوف نے جموں سیاحتی فیڈریشن غی تعریف کی تے دسیو کہ کس طرح یاہ فیڈریشن یاترا غا سیاحتی تجربہ نانہہ بدھان وستے مسلسل کوشش کررئی ہے۔ اس دوران موصوف نے شری امرناتھ جی یاترا نانہہ عقیدت منداں وستے محفوظ تے بلا خلل بنان وستے فیڈریشن تے تمام متعلقہ تنظیمان غی مشترکہ کوششاں غی تعریف کی۔ گائیڈ بُک غا اس سال گا ایڈیشن مانہہ حفاظتی تدبیراں یاترا غا طریقہ اندراج غا عمل طبعی سہولیات رہائشی سہولیات تے ہنگامی صورتحال مانہہ رابطہ نمبر وغیرہ غے متعلق اہم معلومات فراہم کی گئی ہے۔

\*\*\*\*\*

## UNION MINISTER

روڈ ٹرانسپورٹ تے قومی شاہراہ گا مرکزی وزیر مملکت اجے تمنا نے گزشتہ روز توی دریا ور جاری پروجیکٹ گا کم اکج غو معائنو کیو تے چل رہیا ترقیاتی کم غو جائیزو لیو۔ اس موقعہ ور پروجیکٹ دائریکٹر سونیل ٹھسو نے پروجیکٹ غی پیش رفت تے مستقبل غا ترقیاتی منصوبان بارے تفصیلی جانکاری دتی۔ اس موقعہ ور اجتماع نال خطاب غے دوران وزیر موصوف نے توی ریور فرنٹ غی ترقی مانہہ شامل تمام شراکت داراں غی ستائش کی۔ انہاں نے اس گل غو مشاہدو کیو کہ اس منصوبہ نے سیلاب ور قابو پان مانہہ یقینی طور ور مدد کی ہے تے اس نانہہ آئیندہ وقت مانہہ ایک بڑا اقدام غا طور ور پیش کیو جس مانہہ مزید ترقی غی گنجائش ہے۔ انہاں نے کہیو کہ یوہ ایک تاریخی منصوبو وے غو تے علاقہ وستے ایک تاریخی تحفو وے گو۔

\*\*\*\*\*

## GOC WHITE

وائٹ نائٹ گور غا جی او سی نے جی او سی کراسڈ سوارڈ ڈویزن غے ہمراہ اکھنور سیکٹر گا اگلا مقامات غو دورو کیو تانجے قبضہ لکیر ور آپریشن غی جگہ میدان جنگ مانہہ آگاہی تے موثر مشن نانہہ یقینی بنان خاطر جائیزو و لیو جاسکے۔ اس دورہ غے دوران انہاں نے جدید آپریشنل نظام گو جائیزو لیو تے فوجی دستاں نال ملاقات کرغے جدید آپریشنل نظام نانہہ مزید مضبوط بنان مانہہ فوج غا کردار نانہہ سہرايو۔ انہاں نے فوج غی تمام صفاں غی طرفوں پیش کی گئی پیشہ وارانہ صلاحیت چوکسی تے جنگی تیاری غا اعلیٰ معیار غی تعریف کی تے ان ور زور پایو کہ وے ملک غی سرحدان غی حفاظت وستے مضبوط عزم نانہہ برقرار رکھیں۔

\*\*\*\*\*

## RRU SDRF MOU

راشٹریہ رکشا بونیورسٹی تے جموں کشمیر آفات سنگ نمڑن آلی فورس غے بشکار گزشتہ روز ایک مفاہمتی یادداشت ور دستخط کیا گیا۔ اس معاہدہ گو مقصد جموں کشمیر مانہہ آفات سنگ نمڑن تے ہنگامی صورتحال مانہہ فوری امدادی کاروائیاں غی صلاحیت نانہہ بہتر بنان واسطے تربیت ، تعلیم تے تحقیق غا شعباں مانہہ باہمی تعاون نانہہ فروغ دینو ہے۔ اس مفاہمتی یادداشت غے تحت دواں ادارا بکھ بکھ مشترکہ اقدام انجام دیں غا، جن مانہہ تعلیمی ، تحقیقی تے تربیتی پروگراماں غی تصدیق ، ایس ڈی آر ایف اہلکاراں واسطے خصوصی تربیتی ماڈیولز غی تیاری تے ریاستی آفات منجیمنٹ ٹریننگ مراکز نانہہ مزید مضبوط تے موثر بنان واسطے تکنیکی معاونت فراہم کرنو شامل ہے۔

\*\*\*\*\*

## CS OATH

چیف سیکرٹری اٹل ڈلو نے گزشتہ روز سریش کمار گپتا نانہہ عہدا غو حلف دوايو ، جنہاں نانہہ جموں کشمیر آبی وسائل ریگولٹری اتھارٹی غو چئیرمین مقرر کیو گیو ہے۔ حلف برداری غی تقریب سیول سیکرٹریٹ مانہہ منعقد ہوئی جس مانہہ حکومت غا اعلیٰ افسراں تے آبی وسائل غا شعبہ تیں وابستہ حکام نے شرکت کی۔ اس موقع ور اٹل ڈلو نے سریش کمار گپتا نانہہ مبارک باد پیش کی۔ تے امید ظاہر کی کہ ان غو وسیع انتظامی تجربو تے قدرتی وسائل غا انتظام تیں متعلق گہری سمجھ

اتھارٹی غی کارکردگی نانہہ مزید مضبوط بناوے غی۔ انہاں نے کہیو کہ اس تیں جموں کشمیر مانہہ آبی وسائل غا پائیدار ، منصفانہ تے موثر استعمال نانہہ یقینی بنان غی کوششاں نانہہ مزید تقویت لبے غی۔

\*\*\*\*\*

## WEATHER

اج سویرے تیں جموں خطہ گا بکھ بکھ علاقان مانہہ موسلا دھار بارش ہوئی جس تیں شدید گرمی تے لو گا اثرات مانہہ نمایاں کمی آئی بارش غا اس تازہ سلسلہ غے باعث درجہ حرارت مانہہ واضع کمی درج کی گئی۔ شدید بارش غا نتیجہ مانہہ جموں شہر غا کئی نشستیں علاقہ زیر آب ہوا، جس غی وجہ تیں سویرے غے وقت سفر کرن آلا لوکاں نانہہ اپنی منزلاں توڑی پُجن مانہہ مشکلات پیش آئیں۔ محکمہ موسمیات نے آئندہ چند دنان غے دوران جموں کشمیر مانہہ بارشاں گو سلسلو جاری رہن غی پیشن گوئی کی ہے۔ حکام غے مطابق 17 جون توڑی رُک رُک غے گرج چمک سنگ بارش تے تیز اندھی چکھڑ چلن غا امکان ہیں تے بعض مقامات ور ہلکی تیں درمیانہ درجہ غی بارش متوقع ہے۔

\*\*\*\*\*